

包待御集卷之三

華亭包節元達著

湟中稿

五言古詩四十二首

代簡訓張西谷見懷四首

咨余秉拙操膏軸運方穿驅策陟大行膠躋詎  
能前中道搏彫虎力眇墮嶮艱下懸不測谿骸  
骨分糜捐昊蒼曲成貸復假腰領全竄身渾耶  
域厠足戎胡間黽馳與藜藿日夜相周旋齷質  
孤形影愛似勤歲年何意萬里颺枉贈故人篇

其二

故人眇天末淪跡三江漁專精董生幄偃卧段  
公間覃思類揚子著賦擬相如夙抱芝蘭誼遠  
投錦綺書寄通無生死豈或玄素殊契濶情醜  
縷慰勞意踟躕勗我先民矩勉我未死軀詞意  
烈秋霜不爲嫠娃吁開緘增慷慨服佩慰鬱紆

其三

鬱紆將焉適鋒刃薄煩襟匈奴思故土攻剽日  
相尋時亦乘城障騁目天山岑所媿皆窳夫挽  
疆力不任衣被雖三屬占募非百金月糜擔石

儲空負鉛刀心年駛意隨邁旅滯感彌深况直  
凜秋至塞楚日蕭森驚沙瞽窮野勁風灑空林  
霏雪冒層嶺玄雲結重陰物候歎如此但奏苦  
寒吟

其四

苦寒調淒切微吟益長嘆莫愁關山月莫悲隴  
水湍嘗聞征戍客過此摧心肝豈若黃河西遠  
傍玉門關古來流竄地本在三危山苟幸免湯  
錢所在 皇恩寬且無朔方怒庶幾五原還昔  
昔憂僕虜天損良已安羌歌扣歡緒醅釀排憂

端已覺容髮改猶勉藜藿餐牽率酬芳訊願言  
一解頰

暮夏喜霽宴陳園

暑夏積霖潦中庭發洪流高戶限跬武朱明逝  
欲適晨起忽鮮霽四荒爽氣浮巾車一出郭烟  
野撰芳遊遵途饒莽薦列礎激通溝野田刈營  
麥山菓摘榆楸井井華廩圃纍纍邵平疇入門  
竹樹密繁陰蔽層樓藤帷踈障日松塢颯迎秋  
冒然托幽勝恍若陟丹丘主人既字孟公子亦  
如劉俠興傾華屋豪飲促瓊甌季倫焚甲煎郢

客吐名謳牛心炙已侈鵠臠味逾周肥瘦互嘲  
譁醕舞遞獻酬欲辭闌席去復爲夜關留堂上  
已滅燭明月繼山頭虞卿久紆鬱頓爾豁羈愁

夜坐

殷憂不能寐端居夜未央秋風動地起繁林颯  
萎黃房櫳懸明月階除封嚴霜寒螿鳴網戶微  
火艷蘭缸隣家撥哀調琵琶聲遠揚公主彈黃  
鵠明妃奏楚商得非寄廬內憤鬱有餘傷愁人  
易爲感聽之沾衣裳奮袖一憑几展側魂飛揚  
五更扣哀角歸鴈俱南翔欲傳尺素書霄漢限

河梁迺思圖南鵬扶搖度莽蒼一飛九萬里晷  
刻還故鄉我欲從之去佇立以彷徨

對酒作

窮居閉戶久枯槁閱年祀出門皆戎胡入門惟  
鹿豕兀坐專材室鏟跡簷楹裏煢煢形影間惟  
有酒相倚愁來即命觴酣竟即隱几吟嚙爲渾  
沌大化無終始庶幾慰日夕免于鑿竅死所以  
古賢豪狂醒托深旨屈原何獨醒豈若步兵子  
一醉輒浹旬禍至但自弭孟公近縱俠淳于近  
藝姦吾本窮愁人嗜好不在此把杯聊獨酌侑

以圖與史目送白日馳興隨翔雲駛爾時吾喪  
吾天地猶一指安知流沙外雄虺與赤蟻達哉  
公孫朝腹溢將何已

送靜老南還

閉門林壑叟忽作邊城遊意氣薄虹蜺坳堂視  
九州腰佩陸離劍身披紫綺裘慷慨遠行邁不  
爲岐路愁裂繡過函谷吹笳上隴頭八月渡黃  
河玉關逢早秋下馬握予手慰勞洽衾裯首問  
葡萄綠開尊盈百籌酒酣顧余咲何不豁離憂  
雪爾覺陽舒攴輿覆遐陬煖敵窮陰候春生瀚

海頭三冬霜霰少日夕晴嵐浮勝事成絕倒喧  
歌遍戍樓以茲忘旅寓爲歡日悠悠梅花寫羌  
管芳樹吐筌篲譚玄怪急畧卜夜每淹留嘉會  
不可常行人懷故鄉抗旌欲東指判袂擬青陽  
但嗟趙壹鳥不戀馬卿凰含情理星駕回首謝  
莽蒼客子本悽惻送歸彌自傷墨翟泣玄素蘇  
李別河梁高臺一以眺川陸阻且長常情因不  
任况復餞涓陽矯翰入雲際峙岳淹路傍羈思  
隨蓬卷徂懷逐風翔何時䟽屬山懸解恣游揚  
側聞 儲闈信金鷄振未央佳期遡江瀨艤櫂

候維楊茲言倘不爽良晤在秋方

與賴別駕論佛二首

君既精佛戒何復慕仙筌二教殊宗旨嚮往當  
何先佛氏無生滅豈必戀長年薩埵與忍辱身  
相等浮烟仙家正此蔽執生苦拘纏以茲相較  
視未若佛理玄

其二

俗宇太穢濁舉世病狂醒愛海湧波浪情塵累  
嵩衡役役老病死四果竟何成若離一切相不  
但色與聲生滅了如一空有均無名境觀既雙

遣煩惱安從生君能勇精進長夜慧日明吾心  
即淨土彼岸非遙程

和棠溪中丞寄題東嶠書屋

洵美秉雅操高步狹中區金閨少通籍循寄廼  
東嶠卜築清華宇結社求羊徒思玄准平子著  
論擬潛夫躡屐傲秦望垂綸比鏡湖山中饒景  
物烟靄日夕俱水檻蓮初艷芳欄藥漸敷涼颼  
逗脩竹朗月下高梧爾時散帙罷藉草代金鋪  
琴御淮南曲酒命中山娛庶幾托終老歛忽寄  
皇圖旌旄遠風尚纓紱非故吾荒遐一以眺舊

隱宛方壺潘園幸閒適陶徑恐荒蕪因憶滄洲  
勝眷言北山隅心游無競地意與停雲需郊居  
忽草賦帳飲欲投符塵軌較淹速達觀齊有無  
襟期既寥廓肯爲樊籠拘憶昔李衛公別墅在  
東都一自當衡軸羈纏意獨徂寄題遍花木二  
石今模糊高蹤曠千載雅什副前驅

宴薛園

嘉招陶霽景別墅遠喧塵茲方夏將午才似南  
州春杏花初拆葢碧草始成茵數里逶迤逕幽  
竒結構新漢陰既同圃瞿矧復作隣登樓雲冕

朗傍檻石璘彬主人田文齋愛客表清真尊者  
展芳席歡洽難具陳掇豉向余咲何如吳中尊  
不假絲與竹但屬鳥聲頻坐久倦拘迫携觴後  
水濱溪流迅激矢輟挹生餘津彷彿蘭亭會勝  
遇洛川神

宴集魯園大醉賦得公子敬愛客三首

并簡栢峯

四豪本縱俠五陵亦馳騫豈若溫玉姿雍雍擅  
英孌弱冠謝綺紈清襟托幽素悅書復敦禮日  
夕左史晤鄭郊闢閑館孔尊溢清醕言讌蘭臺

賓厭厭期日暮

其二

蘭臺茲秉鉞曩賦長楊殿余乃支離人叨陪廁  
時彥帳具竇嬰筵厨辦虞棕膳亭院肅清幽絲  
桐多婉孌深樹結爲帷落英散如霰興已十日  
過敢惜中宵酒

其三

既酒柰爾何病醒殊太劇詎意狂國泉歛然生  
几席邊墜非陽醉陷池堪誚責沉憂歷數稔陶  
寫幸今夕咄嗟楚江纍憔悴塞垣客招此既已

八包信從集卷三  
誣書空更何益匡坐一飛觴政以慰營魄善款  
有陳遵善釀有焦革聊與爾爲徒衛生此良策  
所賴忘言交諒予如金石

警至

北虜賀蘭來烽臺報警至浴鐵盈萬群射鵰可  
千騎叩關市綺繒執詞做燕冀邊譯不能應蹂  
躪日凌恣疆半皆中行導引罔遺智刁斗徹夜  
鳴羽檄重鱗比駭沸已數月安攘寡筴議帥臣  
本恇怯儒紳亦見戲既乏衛霍兵復少王烏使  
葆歛急星火畜牧坐餒悴高秋怒馬來東畝無

殘穗究竟將若何忍使河湟棄

遇鄉人南歸走筆二十韻寄姪景雲

汝本吾宗彥昂昂千里駒少小稱穎惠潤質比  
瓊瑜賭囊嘗共戲作鳳獨裁珠陳留風可嗣詎  
類太原麤別來已數載雌伏尚群雛中庭係騏  
驥何日騁長驅稟命有通塞力學無賢愚素業  
貧原憲遺經富陶朱稽古語雖鄙徼榮良不誣  
惜陰貴凌駛玩日恐淹需曦輪奔若電歎忽歲  
云徂年鬢一以及撫心空鬱紆徃徃古賢豪早  
歲勵良圖二十洛陽策十八函關繻彼豈從天



降勉旃在吾徒任君夙貴達西華竟葛襦敬通  
雖坎壈子豹策天衢政賴繼徹賢郁烈抗前模  
汝父抱恨沒胡不慰幽途清秋桂林訊徙倚遲  
邊隅

寄贈何白坡謝與槐孔文谷李荆陽四

君子

關河佳氣浮分曹集勝素夙稱稷下游既美蘭  
臺聚未若四子交一體視無忤披襟共蕙蔭晤  
語協韶濩垂左閔歲年和鳴復天路

其二

何晏正始音安石江東彥北海富瑤華龍門懸  
竹箭博古恣冥搜問竒擬清宴塵握互宗盟簞  
徹那奔殿散彩蓮花峯蜚英滿秦甸

其三

玄詣匪空寂賞悟匪誕迂省牒寡暇豫誓師尤  
瘁瘠紛紛吐碩畫煇燁奏明謨迺知相觀益矢  
心翊黃虞存鞞弭荆役徹樽回晉圖堂階握成  
筭所以摧強胡朔方烽火息秋杪靖邊隅惠及  
負戈者遽然卧于于

其四

底麻已多幸音息詎爲期萬里限河漢數載客  
燕支久與世路別緬邈嘆支離芻狗一以棄木  
偶隨所之不謂影電日猶敦風雨思折麻致遠  
道髣髴奉光儀涸鱗潤餘沫窮鳥翼層颺梁生  
華陰詠平子漢陽詩大雅久絕響諸君寔繼茲

哀江南四首

粵嗟江之南華富擅自昔 皇明定鼎來未聞  
有兵革生聚日以繁膏腴遍阡陌歲漕四百萬  
揚舲達京國中土仰衣履窮荒賴供億伊何嗜  
豕狼化爲黥鯢舶妖纏牛斗墟芒焰天爲赤憑

陵閩二稔所至無纖積塞上讀鄉書撫膺徒太  
息

其二

太息將何爲怪此潮汐池 聖世不揚波翻資  
日本夷抵岸即驛突誰爲限藩籬螳衛禦轍隆  
蚤網嬰淫瘼提戈鮮裂皆棄甲有于思盜藪入  
三江翱翔恣所之搜牢慘似昔舞樂亮如斯華  
榱克烈燼胥井封殘髑族行既不及轂走良已  
遲詎知羅綺國厄會此百罹

其三

百罹誠莫追究竟何時已秋風一解纜春至颿  
仍駛大海浩無津奎薄散如螳往來靡歲寧奔  
疲安有紀關局久不開郊野荒如洗縱獲保孤  
城狐兔誰爲使傳聞亡命者導引涉江汜善兵  
非伍胥教戰異宰嚭假息須臾間廼能爲禍始  
舟師倘一戰盪定亦俄爾惜哉無若人凝眸日  
徙倚

其四

徙倚怨脩路憤懣結衷腸言念桑梓域鞠爲荆  
棘場海淺魚龍盡崑炎玉石亡戚屬苟無恙何

庸計草堂引領重憫默問訊滋任勦欲假排虛  
翮瞬息眺故鄉屬厯當宁顧天討始張皇博  
徵欣飛客八月渡維揚驍騰水上軍禽馘掃櫓  
槍庶幾奠鼇極無復泛餘艍捷音計日至羈思  
慰殊方

和孟衛原對月見懷二首

達人嬰世網握符青海陰塵消絕羽檄訟簡惟  
瑤琴歡茲秋夕佳獨坐對星分朗月麗層岫白  
露盈前林靜寂寡良晤命酒聆猿吟中區托遠  
迹顥氣溢清襟撫物情始適懷人感彌深因歌

伐木篇寄予天山岑開緘爛瓊藻戢義重兼金  
其二  
市道喜溷濁俗士厭高虛天月常皎皎舉世何  
邾婁伊人秉玄度孤凌薄蟾蠹階闔淨埃壒霄  
漢凝清矚中有炯然鏡靈光良與俱咨余支離  
客朋舊日以踈况乃傾蓋交金石願不渝茲意  
久寂蔑因之懷古初

歲暮詠懷八首

凜冽歲云暮逝節何駸駸幾歷玄冥雪渺邈天  
山陰荷戈未息肩年鬢日以侵登城望故鄉睽  
隔如商參援琴欲鼓之恐使淚沾襟

其二

大雅示明哲達人識幾微辛有始浩嘆穆生旋  
拂衣朗鑒同一轍南指真吾師伊何秉闇質遂  
與素心違齋土嬰徽纆仰羨黃鵠飛榮壯既偕  
徃衰賤方因依行年茲五十憫默念前非

其三

吾慕陳太丘道廣藩其身吾慕郤令先比屋彌  
愛嗔避咎當若此近禍豈足珍不見漢鉤黨一  
網盡冠紳拯世竟無補捐生等微塵士氣既銷

鑠火德遂沉淪身名貴兩遂所以願良臣

其四

弱齡愛恬曠清襟寄蒼昊歛爾謬通藉褰裳就  
泥潦在告甫三稔再出何草草太行一失路牽  
纏遂至老朔氣易駮瘰脆質漸枯槁本自冥鳴  
身避弋恨不早舊隱蓬萊側歷歷見三島欲覓  
一丸藥駐顏常美好路遠莫致之寄言屬青鳥

其五

鄉國別已久遊子何時返情同庾子山人殊班  
定遠閔凶歲荐臻離懷日憤懣滄海復妖氛三

江忽巉巉音息訪無從枚浹眺層巘野哭聲更  
哀醉酒日晚晚戰罷掩遺骸孀嫠持鍤畚問之  
泣且訴令予益悽斷歸來且命觴玄情洽稽阮  
其六

遷史進貨殖其旨頗微妙家貧莫與營蠶室誰  
相吊憤激爲此論後世苦評誚肇昔自閑散貝  
輪涉海嶠金行召都尉寶獻輸左校陳迹傳至  
今頽風轉燔燎所賴原憲賢蓬蒿發孤嘯

其七

蚤蚤負屨趨患難不避易林回亦庶幾能棄干

金璧茲意久寂寥温涼異朝夕交窮曩見虞勅  
代鮮逢式躍馬滿天衢平生寡相識一葉倘從  
風何損鄧林植以茲自安土九卦相憑藉

其八

世道本澆漓邊城尤惡薄錯處皆戎胡土風類  
豺貉側有競朝市回首咲東郭禮義譬芻狗周  
孔任嘲謔我生值數竒危地翻爲托足躡孟門  
巔魂驚呂梁壑何日賦言歸江干采薇藿

門有車馬客贈吳生

銀鞍被紫駟寶劍驪駟裘凌寒陟隴首泮凍詣

西州貨逾陽翟賈誼敵魯朱儔遮險因投馬犒  
師魯市牛片言重金璧萬里相追求逆旅不少  
憇遽問南冠囚具謁陳姓氏坐定述所由少小  
寓河汴近歲客燕幽既事夷門隱旋過易水游  
慕尚自天性布武遍遐陬因與洽尊俎意氣長  
虹浮嘖喑寡寒燠調傲輕王侯細論衛霍事欲  
斬月支頭酒酣別予去一眺城西樓目中無全  
胡思爲報國讐傾裝買汗血言赴漁陽秋

結客少年場爲邊人作

拳勇推六郡豪舉擅三秦往來惟劇孟隣並有

孫賓一上倡樓醉千金擲與人居閒跨馬去所  
至能風塵劫質新豐側探丸灞水濱干楸不敢  
近名捕及姻親邊城亡命久隱約多苦辛會逢  
募兵檄昨始脫荆榛焚丹擬著效洗堊誓圖新  
得隨征虜去雲中搏戰頻虎發羽尋沒猿號技  
若神以茲富禽馘勲名日益振授官還故里綺  
服縮通綸道傍相指點嘖嘖有餘嗔曩蹤類伏  
鼠茲榮等畫麟廼知若思者一變即良臣

夏日竹宴觀黃冠羽服之戲

塞荒饒楚莽茲圃獨林篁萬握翠瑯玕脩迥拂

雲翔結陰當重幄緝篠代繚墻翛然坐其下灑  
滅生微涼引澗既以疾遽羽無停觴始訝涉淇  
水既欲擬山陽况逢霞外客嘯侶共徜徉言從  
崑崙來逝將探扶桑手操碧玉管被服紫霓裳  
易貌逞幻戲按曲轉清商上元惚恍至彷彿瑤  
臺傍爲歡晚逾劇迨歸興未央緬懷嵇阮會詎  
敢嘆殊方

雨中聞山人李翁卧病懷訊二首

端居抱積慘緬懷華顛叟相望非阻脩離索良  
已久瑤琴網輕埃孤榻懸虛牖高卧不可期佇

立時延首博恐仙人滯玄應隱士守溽暑淋漓  
盈居窮何所有池邊交讓枝門外先生柳終朝  
挹蕊猜誰與共杯酒

其二

屬聞苦重脰緩弱不能步泉石癖彌留烟霞疾  
已痼褰帷遞閑雲倚枕寫芳樹門巷掃轍迹冲  
虛寡良晤何不覓刀圭杖策支日暮崑崙富瓊  
蓋上池溢朝露真訣傳至今性命良可度仙靈  
眷淑懿恍惚助將護

雨中愁劇即事述懷數體三十韻

余本水鄉士譴逐月支營土壤接西域氣候限  
長城扼虎力不任禦魑魂屢驚日接蒙茸侶俱  
繫曼胡纓多羅盛酪釀服匿啜羊羹避羶常引  
疾畏侮但佯醒甌脫塵稍靖蹠林火復明滿天  
哀角起中夜悲笳鳴坐卧千愁集朝昏萬慮盈  
飢渴思歸久鄉心注牛斗歲月損朱顏風霜催  
白首玄朔化湘柑脩陵植華藕結托迥寒燠芳  
榮易衰朽夢裏已雲翔覺來猶墨守迢遞小山  
桂荒蕪三徑柳凝眸欲樹萱排憤湏尊酒四人  
鮮相值一體孰能友客久管寧歸仙成梅福走



慷慨慕伊人，虛盈問北叟。邇值霖雨多，羈懷柰  
若何。沉雲顏並慘，瀉雷意俱磨。四荒絕行跡，中  
庭發洪河。無從載酒至，誰爲裹糧過。窮途阮籍  
哭，閉戶子桑歌。歌竟循餘砌，山頭候鮮霽。擬作  
乘真游，行吟過水滌。卜漁良已遲，忌鵬終爲蔽。  
驪姬悔始泣，鼈令延先瘡。變化有真宰，倚伏難  
預計。豈若任運行，慧日懸真際。

方朔圖

緊昔李耳後，始見東方生。光塵究玄旨，恢咲轢  
公卿。穢德似避世，薄游非慕榮。塵踪廁金馬，仙

錄隸紫清，三偷海上桃。幻化難爲名，累劫示龍  
變。竭來降星精，伊何好直諫。陛戟日觥觥，既輟  
董君宴，復尼壽王行。涉險探驪珠，豈爲哲且明。  
所賴漢武容，庶幾保吾生。假令犯猛怒，工拙徒  
爲評。

七言古詩二十二首

成將軍出示谿田光祿先生所惠長歌

因和贈

光祿婆娑七十翁，閉門鄩杜傲王公。片言出口  
重球璫，却爲將軍灑毫素。凌亂緗縑千百言，擲

地鏘然協韶濩將軍二十羽林郎短後危冠從  
武皇本自臂猿椎北地幾迴搏虎獵長楊英聲  
一旦動黃屋天街萬乘親推轂御題龍劍賜專  
征十萬貔貅趨上谷輕麾夜半逐休屠奪得金  
人載駃騠封骸已並燕然石數實猶存董澤蒲  
捷書忽上明光殿歡傳特賜班師宴教坊拍手  
唱平胡畫工擬筆開生面無何白騎亂幽燕選  
將期門復受宣寵擅漢廷誰比數主家紈袴豈  
論先矢心報國擬捐軀蠅沸蚊雷已噬膚功成  
不免中山謗盟後旋令息壤誣迴掌湏臾成弃

置携家轉徙河湟裔山中別創邵平園亭下常  
逢李廣騎自分寒灰終卷箒豈期餘燼猶輝奕  
一隨大將過天山雄鳴獨獻擒胡策北平還召  
故將軍起官徒步承恩澤我當流寓適逢君高  
誼峻嶒薄塞雲說劍談兵無日夕邀賓置驛常  
紛紛花時坐我華屋下錦筵羅幙春氤氳酒酣  
擊筑更豪儻使我懷抱驅煩氛丈夫七十尚如  
此委瑣應慙兒女群人生倚伏真難料君不見  
湟中白首成將軍

西崑歌

吾聞金天之西有崑崙丹梯萬仞干天門玉樹  
珠林互蒙密鸞儔鶴侶時騰軒中有仙靈久閉  
關魯城玄圃非人間山經紀載虛想像博望行  
遊空往還迺茲降精生甫申世持龍劔淨邊塵  
河外藩宣誰比數漢家鍾鼎稱元臣功成更受  
長生訣山頭幾見桃花春

題莫都司迺翁東山八竒卷得長句

我昔過湟中探歷吊往事因懷充國叟溝塍有  
殘穗嘆息今無人佇立時延企迺從父老問所  
知爲道東山擅八竒東山將軍素虢闕百戰驅

胡定月支敦禮本來如卻穀借籌未必減衣絲  
故營猶擁將軍樹遺澤唯傳子墨詞開卷令人  
倍惆悵明珠歷落空所思即今嗣子紹英芬璽  
節新頒玉殿雲君不見湟中之業方絕群咲予  
却憶趙將軍

送吉將軍鎮寧夏賦得賀蘭山

君不見朔方之陰鎮賀蘭萬疊尚巒翠鬱盤石  
髮山衣景蔽虧控弦十萬巢烏桓秋高氣肅膠  
始折大漠烽烟遍山岳蝟起颺馳不可支三秦  
內地遭殘裂羽檄頻年報王京天皇宵旰在蒼

生禁中特念穿楊將河外因推細柳營提兵始  
定焉耆國仗鉞還臨拓跋城金壇麾羽切雲霄  
坐使龍荒氛祲消罷戰歸來聊蹴鞠受降從此  
息鳴焦廉聲夙並張都尉武節寧論霍票姚吾  
聞賀蘭山頭蒼珉綠碧光晶熒礮之可勒班生  
銘

梅塘歌爲盛古泉侍御廼翁作

卜築林塘遠城郭幾樹江梅冷蕭索無言蹊畔  
自芳菲姑射山中甘澗落穿池本愛洗心泉繞  
岸靈葩更可憐崑崙玉樹龍沙裏犯雪飄英石

鏡前孤榮不受歲寒移清賞偏於水月宜托根  
舊屬蘇園種表異新栽禹廟枝點點輕花拂壽  
觴盈盈淨寫曉來粧影亂波文疑浣素樹搖風  
夜劇焚香山人對此幽興多酒酣能唱郢中歌  
陽春綠水調孤絕借問羅浮較若何君不見江  
干種梅叟冰雪生涯無所有結實纍纍幾歲華  
年來始得調羹手

塞上行送吳生端人自酒泉遇王中丞  
因還姑蘇

塞上從軍多苦辛君來數月倦胡塵黃金欲盡

烏裘敝萬里燉煌只此身自分生還未有期荒  
遐那意故人知中丞使節來西汜得綴旄端還  
舊里征途十月馬支雪朔風戟面天凜冽徒行  
數日渡臯蘭黃河百丈冰如鐵行行東出函關  
道汴水吳雲次第好梅花正發館娃宮歸去家  
園頃及早丈夫失路且泥沉何必邀功紫塞陰  
震澤烟波渺無際買舟漁釣相招尋興到一登  
湖上山試望河湟道嶮艱臨觴且幸鄉關樂顧  
景無嗟旅鬢斑我亦明時流戍客邊城數載羈  
愁劇可堪落木送將歸心折津岐淚脉脉

酌酒行送申衛幕

世人齷齪苦不休一謝宦遊即慘阻鐻白冒班  
頗無味茫茫苦海竟何所所以古來賢達人投  
劾拂衣常齟齬吁嗟此意久不聞迺今侗儻見  
申君罷官之日獨長嘯意氣翛然凌紫氛自言  
數載客邊城幾度鄉心逐晉雲得歸恰遂幽閒  
性垂老寧忘麋鹿群君家舊隱中條麓精廬別  
構王官谷山中氣候正清和散髮披襟坐脩竹  
丈夫處世貴適意辛苦徂年空閃候冥海榆枋  
各有餘斤鷄翔鷗均覆育多君高誼酌君酒白

壁黃金媿無有酒酣但誦逍遙篇殷勤一折河  
湟柳勸君東出長安道試問五陵之豪誰獨久  
仲春之夕夢侍先伯兄北樓游宴西湖  
歡甚既寤始知有存亡今昔之感投淚  
枕席作憶昔行伯兄以乙巳赴選卒於

京

憶昔閒居事草玄兄亦初偕計吏旋居幸鵠原  
豐暇豫共騫鴻駕擬靈仙採藥幾攀滄海嶠煮  
茶同品晉陵泉花時觴詠無日夕湖上行遊閱  
歲年人世爲歡詎可常湍驚雲逝歎蒼黃旅魂

一入燕山道予亦微纏過朔方回首陳踪懸俛  
仰傷心往事限存亡分岐不免揚朱哭索路那  
禁阮藉狂夢裏相逢蹙相適醒來惆悵情何劇  
西湖佳麗宛如初苦海風濤恨非昔謝家一罷  
烏衣會幾度池塘芳草碧何時載泛六橋春酌  
酒斜陽訪遺屐

石靜齋叅藩范栢峯憲副姜東臯馬清  
溪馮北城三帥共設宴郊園見招偶有  
爲不赴既見靜齋謂東臯不能釋然於  
予也賦行路難以謝之

芳園枕郭本非遠其柰巾車驚絕巘出門不假  
五丁通即路偏疑九折坂欲行不行避畏途因  
憶古人誰與俱秦宓即飲且高卧灌夫服往何  
其愚予本悠悠羈旅人靜觀塵世了無因相逢  
稜岸等嵩岱誰能蹋面不知嗔萬里襟期在意  
氣何必席上通慙臺中石公於予善道君真  
率開芳宴傾蓋之交迺若此未挹尊壘已沉酒  
吁嗟乎人情嶮巇覆掌間太行孟門莫登攀

壬子夏六月有虜中降人驅百馬入塞  
遇餓虎三四自林中突出噬其半以去

降人僅身免于悲其窮而恨虎之過暴  
也賦猛虎行

邊城猛虎日蹲岵厲爪磨牙過豻軀不能噬虜  
偏噬馬餓臬突起誰爲虞昔年敗北昆陽戰今  
見穹廬益股抃降人萬死幸歸來何意遭罹恣  
蹂踐擇肉能飛似暴秦考精解學九方堙一吞  
數十未屬厭咆哮猶睨道傍人何不結徒嘯侶  
靖虜窟雲錦千群還塞樾降人驅馬能幾何充  
爾一飽無遺骨安得弘農化大行渡河北去惠  
蒼生又安得中黃逞絕伎手搏太行驅爾類

河西人極崇佛法大家布施小家齋誦  
蓋漸染身毒之教然也客有夙事佛者  
一日過予叩以內典大旨愕不能應予  
竊訝之不知其脩行精進何處着力因  
示覺言遂成長句

汝崇佛教自少小宗旨如何猶未了菩提樹長  
無垠外波羅岸薄扶桑曉妙因不悟徒紛紜可  
憐朗日覆重雲萬劫只迷煩惱界千輪還墜衆  
生群法門種種總由心藏經大部俱蕪音根塵  
對境心不起碧霄甘露清煩襟智慧爲航度苦

海盈盈到岸皆禪林舍心求佛祇自苦唐突頭  
顛同隊父縛障窮年烈焰騰解脫何時逢法雨  
傾財布施倖功德金玉恒河了無益姚崇命子  
有至言住相安能遍八極周妻何肉悔猶遲况  
爾酣淫日夕馳金剛銷鑠且垂盡善果剝落無  
纖枝君不見真性如如本圓寂淨土彌陀當自  
覓悟來無法亦無空翻訝達摩還面壁

尋仙行誦温幼海別後見寄温迺山東

登州人

別後阜蘭惠彩箋開緘飛動遠遊篇南州豫訂



尋仙約往劫曾聞授勝緣  
憐君本抱烟霞癖舊  
隱蓬萊乘丹碧我昔  
征行過層樓凌波曾  
挂滄洲席榻來西塞  
忽逢君披襟時散紫  
陽芬人中嗜好頗不  
屑物外騰軒擬共群  
桑海東歸歲復還言  
從吳越訪玄關陶公  
結屋華陽洞許邁棲  
真懸雷山招尋未定  
歸依地氣色先占牛  
斗間願惠神通解疏  
屬同騎倒景馳人寰

中秋趙衛博招飲得長句

廣文先生能好客釀黍  
盈缸開宴席飛觴簷宇  
夜蕭蕭萬里清光團皓  
魄首着盤餐味獨佳散

帙投壺興偏適隔院胡  
僧梵樂來絕勝霓裳按  
仙拍醉餘身世非人間  
列子凌風生羽翮廣寒  
氣肅怯衣單緩步天街  
陶永昔

再有聞始知忠慎者保  
身盈肆者兆禍  
賦長安行路難以存烟  
戒

長安馳道平如砥深谷  
周阿石齒齒金張許史  
並經過擊轂挑肩暝不  
止持轡攬轡稍踈縱  
矜一墮蓐螻蟻朝策飛  
輪暮絕肱草頭零露歛  
凝霜白骨槎枒血丹野  
詎憐金穴併娥房行人  
過之不敢問但咲當年  
寵作殃鞅誅斯滅互傾

軒鏡鑑沉昏共聚體繡文無復存犧畏牢筴那  
知爲彘謀軟沙芳草真險巖矛頭折米劍頭炊  
忠能貫日智及葵即使羊腸側足非阨危

相逢行贈吳掾

門前車馬越中客秦望烟雲滿巾舄翩翩文采  
異常流十載黃麻供玉冊草檄初從幕府徵吐  
竒擬獻平胡策天山歲暮忽逢君攬衣問訊南  
州驛滄海黥波政拍天金陵魃旱無兼石羈思  
鄰心不忍聞破涕爲歡共浮白荒磧無人似者  
稀越吟何幸聆今夕

貧將行爲青眼劉將軍賦

壯年雄勇冠西州百戰揚旂瀚海頭橫刀躍馬  
疾飛電胡騎相逢齧指愁面白打堅曾憚石眼  
青驅虜更聞劉手斬觸體嘗滿匱百金一級無  
盈縮得來罄手犒軍麾耻事興生營產蓄自分  
鷹揚每若斯詎憐猿臂歛逢竒老去龍鍾復禮  
縷菽藿頻年總不支巖室蓬麻寒背郭風聲雪  
片資蕭索拾穗曾無林類裘行遊時帶榮期索  
道傍爭問爾爲誰不知故將今寥落邊城豪貴  
棄如遺鼠壤餘蔬少賑施習俗但趨糜竺火由

來不療鄧通飢吁嗟此風何可長當日優伶曾  
抵掌河西貧將慎莫爲不見劉君成魍魎與作  
驎飢各落毛何如虎飽多藏鏹

廬山高寄桑子木

廬山萬仞干蒼天聳削香鑪噴紫烟俯瞰官亭  
浩無際山容水色涵澄鮮肇昔匡君得道去就  
中徃徃棲靈仙吾輩賢豪亦慕之後先寓托相  
蟬聯謫仙之後白公來素風玄軌至今傳夫君  
本是中臺彥無端謝病嬰嚴譴十年坐對芙蓉  
開九疊時驚雲錦見閉門齋誦藥珠宮黃庭展

卷周千遍間過白鹿授諸生春風滿座花盈院  
董奉林前采禁方陶公宅畔張芳宴物外生涯  
已擅竒塵中冠冕寧須戀我昔游滇嘗唁君竭  
來西塞亦從軍苦海風烟真若幻天涯淪落更  
離群魅積龍荒沙渺渺南州音驛應稀少昨日  
潯陽忽寄書清秋洒淚握瓊琚祗訝仙翁能跨  
鶴豈期江使解傳魚深山歲月憐無恙更道禪  
林久卜居倘從宛秘窺真訣佇伺緘滕一啓予  
生還定陟廬山巔丹梯石磴同周旋願侍藥爐  
爲弟子擬餐靈液駐衰年

東山圖

東山幽勝地謝公丘壑姿物外烟霞本自足何  
必妖淫竹與絲舉世齷齪皆此說曾無濠上悟  
心期達士襟懷罩宇宙天倪曼衍隨所之根塵  
相對一不染誰爲臭腐誰神奇王公厚善且誚  
責悠悠千載誰能知君不見氏胡百萬渡淝水  
晉室存亡寔在茲從容宴語捷書來不異東山  
携妓時試問當年矯飾者幾人談咲却秦師

題西湖圖

塞上羈栖歲月久武林佳麗時回首夢裡行遊

幾度過覺來忽恍曾何有天涯張宴偶披圖欵  
然几席生西湖得非巨靈逞鼉負負之夜半趨  
邊隅青陽艷日蕩樓船士女喧闐奏管絃博塞  
藏鈎恣飲譎遺簪墮珥競妖妍湖臨城郭本豪  
奢域內山川總未誇烟含梵宇三千界水抱青  
樓十萬家巖巒合杳紫珠岸花柳芬霏漾碧沙  
更憐清夜思飛越六橋湧沸晴波月雨時萬籟  
歛空山獨倚孤亭待鶴還天闕石鏡仙靈宅一  
屬氛埃厭偪窄何不置之莽眇鄉列真呼侶共  
相羊媿余數載河湟客乍覽湖光亂營魄祗疑

佛力羅空虛不解繪人工色澤沉酣相對竟忘  
言恍移身世武陵源

與花亭

將軍初罷漁陽戰卜築芳亭恣遊宴手植名花  
種種竒丹葩碧葉和蕊舊曉露英英裊絳霞春  
風幡纒飄飛霰主人中聖日微醺獨倚欄干擁  
侍娥輕帷遍列蒲桃錦長袖新裁孔雀羅帖席  
腰支細盈把着爪能調麗玉歌咲向亭前較容  
色顧問花神艷若何

夏日園中吟

河西風氣屬金商一年強半零雨霜止有盛夏  
稍溫煥恰如南國萌春陽主人闢園可數畝千  
章檀杏彌崗阜蒙密陰森夙擅竒數年客舍成  
吾有逶迤一逕日行遊時倚胡床傾濁酒樹上  
鶯來擬住聲住聲生心山頭鹿過堪爲友拾花咲比  
館娃棠攀條悞作橫塘柳悲默爲歡祗自知那  
憐雙鬢已成絲潦倒天涯憑夢幻佯狂身世學  
支離醉來但覺扶搖上却訝天池亦在茲慟哭  
長沙何不達離騷江畔反爲嗤不如且向園中  
賞造物虧盈有定期

處世行贈友人

前年別我江鄉去，邊庭五月雪初曙。今年復自楚中來，秋風灑撼單于臺。河西路遠羌胡族，行人過此心膽縮。惟君孤劍獨行遊，秣馬往來何迅速。三十明經不得意，挾策風塵遍旅肆。黃鶴樓前挂曉帆，芙蓉掌上馳空翠。裝橐曾無宛孔資，振施頗重朱家義。竭來再度天山道，烟霞冉冉凌蒼昊。一尊遙惠建康清，把盞令人豁愁抱。更憐擁腫與世疎，渾沌無眉內有餘。庚桑歲月偏宜久，張閣胸懷總自如。一切能消煩惱火，處

世如君寧有禍。我方力學苦未能，問君何從得此果。倘事支公有偈言，願拔泥途乘法舸。

五言律詩四十七首

九日宴西寧城樓四首

九日逢邊郡，登高倍黯然。山風寒擁葉，城日淡浮烟。菊亦窮荒見，萸應故國偏。何期流竄客，猶接歲時筵。

其二

分閫多休暇，邀歡陟塞樓。欲酬陶令節，翻切仲宣憂。山抱河源起，雲從海際浮。平生蕭瑟意，重

遇玉門秋

其三

將軍能愛客况復值佳期舞帳隨櫺轉歌筵傍  
檻移射麋供野饌彈雀助闌卮醉已過山簡愁  
應慰楚儀

其四

麗譙通絕塞酣宴送斜暉射覆燈垂幌藏鈎月  
近靡胡茄彈蔡女羌笛奏明妃已極從軍樂寧  
辭分夜歸

寒夜

邊城清夜迥孤坐倚征鞍庭雪排檣起山風入  
漏殘整襟灰易冷擁枕夢猶寒不寐頻窺戶星  
河曉欲闌

對客鑷白漫成

支離淹絕塞楚毒欵經年覽鏡形將老殮英意  
欲仙侍童能鑷白坐客解談玄支遁遺篇在冥  
心已棄筌

日者余生自成將軍所過予遲約經旬  
口占贈之

策馬來何晚垂簾市父踈豈從李廣獵遂秘蜀

嚴書泛梗方迷路懷椒擬卜居天高不可問賴  
爾測盈虛

睡起

小樓酣睡起旭日半檣踈喧爲城鴉集忘因夢  
鹿餘灌園分溜水鬻市採山蔬生計聊如此吳  
儂亦遂初

春日薛將軍招宴王園觀蹴鞠之戲

瀟洒園林勝招尋物候妍因呈嫖騎戲言敞薛  
文筵羽爵蒲萄綠春盤首宿鮮方竒傳博望咲  
予亦多緣

憶家信

歲月音書斷鄉關夢裏過川原通絕塞烽火隔  
長河爲客風霜久思親涕淚多不知緘信至憂  
喜定如何

酬劉別駕自涼州見寄

能以行邊暇懷人數惠詩開緘盈錦字把握過  
瓊枝雨雪天山道烽烟瀦澤涯何時返旌旆一  
爲達襟期

贈陸叅戎席上彈琴二首

英武本天性烟霞亦素心松間開小酌席上寫



鳴琴愴惻思歸引淒涼出塞吟坐令承睫淚聽  
罷一沾襟

其二

愛爾朱絃賞端居幾度過塞寒飛雪早簷靜落  
梅多舞鶴流清夜離鳴拂絳河不禁羈楚意聊  
爾托微醅

贈魯孫

繁弱傳封父名刀佩呂虔更看龍額起重覩鳳  
毛翩竇表平胡績常稱扈從賢卽君真不忝都  
護世行邊

題平胡大捷圖

陰山氛祲久青海虜塵多一自持龍節崇朝奏  
凱歌邊風傳怒角塞草振靈鼉封燕勳應並圖  
麟炯不磨

五日同雙溪小坐二首

萬里投荒日三年去國臣偶逢時序感重愴別  
離神簷杏稍雲密山花過雨新芳華聊可玩况  
對故鄉人

其二

歲時傷旅抱幽獨命吳歛采佩分叢藥浮觴折

短蒲俗穿長命縷人尚避兵符物候同湘澧偏  
慙楚大夫

訓李濟南蟠峯見訊二首

劇郡當無暇何能憶遠人驛隨青海鴈書發錦  
江鱗貽紆爲歡後披雲入夢頻遐荒正寥落驚  
躍奉音塵

其二

一行河外客朋舊欵然無失路誰憐范交窮賴  
有虞素襟江月迥高誼岱雲俱得返陽關道言  
探李白湖

劉豫軒過訪因小集

結駟朝端舊遷鶯塞上來相逢聊把臂欲別但  
啣杯繞砌翻紅藥當筵奏落梅平生酣暢誼一  
爲慰羈懷

與諸君子花下小酌次趙衛博韻

宿雨開新霽芳華潤欲流因懷嘯竹侶偶集看  
花傳命酒能懸解烏門代遠遊廣文摘藻興秉  
燭故淹留

胡將軍携宴宛卜寺納涼

愛客携芳宴諸天幾度過禪心斷絲竹幽興托

烟蘿日爲揮戈久涼因擁樹多留歡殊未已譚  
劍坐明河

秋夜新月同張贊畫寺中飲酪酒觀胡  
樂

桐馬尊初發涼蟾魄乍臨桐林深白露碧殿下  
玄陰劍舞降胡伎笳吹出塞吟更憐平子賦并  
慰楚囚心

訓與槐次來韻

音容天路迥消息汴中來冒雪過梁苑乘風上  
吹臺宦懷知不惡年鬢恐相催東觀方虛遲行

看視草回

送王別駕致仕還蜀

羨爾拂衣去悠然出網羅蜀江春色好舊隱竹  
林多歸揖青霞侶相羊紫蕨阿何如邊塞役辛  
苦但婆娑

送劉將軍解官歸

政倚長城險翻摧上將壇建牙營月滿卷旆朔  
風殘書自中山至盟憐息壤寒壯年雄劍在計  
日斬樓蘭

秋夜

凄清旅館夕徙倚對明河庭樹銷潘省寒蟲避  
翟羅鴈歸砧響急烽至角聲多不寐殷憂者長  
更柰若何

同范柏峯憲使宴集陳氏園樓二首

邊地多荒寂茲園選勝偏登樓紛擁樹遶逕曲  
通泉地似藏書穴人疑作賦年叨陪還自訝聞  
樂重凄然

王粲避地荆楚有登樓賦竊以自况

其二

憲使停征旆將軍展燕筵鼓鼙芳草外尊俎落  
花前塵柄專文雅鷺喉過管絃不嫌歸路晚列

炬滿郊塵

贈陳文崗恤刑河西四首

給舍嘗鳴鳳分曹復綴鵷當年傳諫草此日見  
平反名重偏驚孟才高欲並蕃豈期荒磧外晤  
對一停轍

其二

天上馳星傳人間迂使旌冰銜丹禁冷春到玉  
關明九地恩應徧三秦雨乍盈不知鷄樹信何  
日鳳樓鳴

其三

問舊情何薦通家誼獨慙草深綠避客花發爲  
迎君攬袂雲俱合分襟日易曛離鳴關塞曲哀  
怨不堪聞

其四

幽獨鳴騶至留歡命酒頻旅荒惟庾蒞鄉遠少  
江蓴因訊中朝事誰憐絕塞人籌邊倘有疏早  
晚靖胡塵

訊梓兒

知汝西來意翻令訊憶頻弱軀登險道炎暑抗  
胡塵作字能模晉爲文欲過秦凝眸向烟際計

日共沾巾

和李山人溪上無題作四首次來韻

姣麗誰家子芳堤步淺苔雲疑襄館至燕訝漢  
宮來解佩常依水聞琴獨倚臺懷春眉語度行  
路莫相猜

其二

城隅纔麗日陌上恍逢仙窺宋情初結從韓態  
轉妍荷妖凝曉露柳弱縮輕烟粧罷翻疑鏡盈  
盈照水前

其三

平陽從學舞金谷每徵聲被襖春曾約看花侶  
共行含羞掩羅袖理曲試銀箏芍藥無勞贈芳  
華有夙盟

其四

不信傾城咲邊人今始知圖堪遺冒頓色本奪  
烟支蔡琰降胡日王嫱出塞時容華能並否吾  
欲賦陳思

寄郭似菴二首

泰階方命闔荒漠遽從征帝造回瀕厄 君恩  
賜再生愛遺燕甸石人倚鴈門城未老孤忠在

汾陽注 聖明

其二

乘障隣嚴譴籌邊仰舊勳久從中禁別茲訝昨  
年聞塞驛通烽火河梁限隴雲無因奉顏色澤  
畔愴離群

立秋日與客樹下對夕陽小集因聞琴  
露坐無帷幄棠梨樹頗稠叢陰還障暑密葉漸  
驚秋鶴為聞琴至人因待月留晚來蕭瑟意賴  
爾慰羈愁

寄題都護大通別業二首

功成不受賞高卧軼氛埃草樹藏丹洞烟霞結  
吹臺城懸崑嶺峻水抱拆枝來幽勝重關掩經  
春長碧苔

其二

卜居遠俗宇結構托祇園逕側才通鳥山深祗  
嘯猿本能金作穴翻喜竹爲垣老去耽禪寂調  
心挹化源

凱歌二首贈孫將軍

躍馬能深入摧鋒恐後期獨捐扼虎力生縛射  
鵬兒法授陰符秘軍從遁甲竒平生橫行意矢

欲定西陲

其二

提兵不滿百轉戰逐輜輶疊鼓回營雪塞旗扶  
陣雲虜遺殘壘遁俘擁捷書聞振旅歸來日勳  
名已冠軍

羈旅多愁長更不寐展轉枕席忽爾沾  
裳蓋欲力修忍辱仙人之行而未能也

漫占二首

幽寂常扃戶淒涼獨擁衾魂隨江鴈去愁薄塞  
雲深數箭更偏永褰幃月未臨數年爲客淚茲

夕一沾襟

其二

插羽天涯客驚逢歲暮身胥靡曾不懼忍辱尚  
知嗔化蝶隨酣夢爲鷄托妙因吾生何昧此展  
側重傷神

訓武林石山人見懷二首

瓊樹風期阻瑤華訊札頻力農應得歲貪隱自  
忘貧水月西湖夜烟花上竺春相將有誰侶定  
憶塞垣人

其二

山中無俗累河外重離憂幾度吳淞泊言追石  
屋遊邊塵開遠道天漢下孤舟枉存曾約遲  
爾數登樓

夏日雨後過陳園二首

選勝遵郊郭衝泥試杖藜溪承新瀑水山渡欲  
晴霓看竹人先至穿花鳥自迷咲予來幾度才  
識小亭西

其二

入門不問主何事亦將迎暑謝藤爲幄風迴樹  
倚楹調羹分紫蕨獻菓摘朱櫻向來投轄地未



必勝茲行

過白厓寓

共是天涯客言尋物外遊殊方脩白社衰鬢付  
丹丘歲月邊城鴈煙波水國鷗相憐復相憶匡  
坐數離愁

送邊判官致仕歸阜城

辭榮年未及率爾厭風塵芟作行園服雲裁漉  
酒中山花迎去旆塞月伴征輪興逸烟霄外瀛  
壖訪列真

聞吉將軍招周白厓至喜而有作

深居防醉尉懸榻致幽人門掩張羅日車逢入  
幕賓對花沾舊雨藉草縮初因竇灌當年誼嶙  
峴薄漢旻

得范翁海南書誚寄二首范絳人也曩

貳郢同予下獄

謫久憐無恙貽緘慰所思年知逾絳老術已授  
玄師郢水傷心日幽都對獄時取圖身尚在復  
此達風期

其二

白髮同嚴譴焦原共此身幾年河外夢時對嶺

南人柳葉常多雨梅花獨早春何如玉門路荒  
楚但胡塵

出郭即事

經年才出郭春事滿平沙畫閣初巢燕幽亭晚  
作花徑懸苔嶺仄溪逸竹林斜旅思方無賴那  
堪閱歲華

寺中同諸君偶集

妙因逢賞會苦海到禪林欲離塵中相聊清物  
外心花凝甘露潤柳和法雲深竟日空堂坐令  
人忘越吟

送劉別駕自酒泉罷官還魯

數載邊城宦曾無陸賈裝纈能消積雪棠已覆  
嚴霜泰岳烟霄外靈光泗水傍送君還舊隱瀟  
洒恣翱翔

與客野坐二首

步屨因逢客班荆偶列筵錦茵花滿地翠幙樹  
彌天瀑寫漁陽慘鶯調陌上絃因忘巢燕日聊  
慰問漁年

其二

郊園開野酌恍坐北山阿喜似緣逃藿開顏漫

擬荷宛藤消酒易嵇樹合歡多坐候山頭月關  
城夜不訶

得亭臯涇陽書懷寄三首

近得涇陽信聞從蜀道還惠應流錦水名已埒  
巴山意適花俱咲機忘鳥共閒到鄉行計日朋  
舊近歡顏

其二

宴語湟中日知君已倦遊遂初今有賦招隱若  
為儔樹擁分甘地人躋訪道樓向來塵冉冉茲  
去即滄洲

其三

憲使翔龍節征人滯月支晦明勞遠憶風雨達  
佳期隣女光猶在波臣水尚遺無因報瓊玖惟  
有策筇枝

客居漫興四首

龍荒留滯久身世若憑虛遣境觀空後無生面  
壁餘靜厭山鳥集閒愛嶺雲舒已適逍遙際何  
緣嘆索居

其二

四序寒偏久青陽夏始知山風翻芍藥庭雨拆

八包仙集卷三  
四  
醪醖竹箭灘聲駛烟支石磴危酒酣頻眺聽端  
欲慰遐思

其三

塞外烽烟息旅中生事踈駐顏脩藥累多病輯  
方書愁爲聞猿罷觀因控鸞餘但能謔獨酌何  
敢賦閒居

其四

隣院聞清磬胡僧吐梵音吹螺能止雹沉石解  
興霖樹列祇園遍雲叢鷲嶺陰法門甘露近當  
暑滌煩襟

同趙衛博李山人過曹園納涼三首

不慕封侯貴因開離垢園擘榛通野徑疏石引  
仙源庭擾樹尊鹿山多獻菓猿幽棲已霞外真  
可謝煩喧

其二

館非金谷麗亭似習家幽溪瀑能迴磴山雲欲  
障樓蓮開佛土艷竹倚嶰陰稠本自西王域靈  
仙此易求

其三

廣文張雅席山叟挾鳴琴避暑同河朔羈遊異

尚禽兩牧罌粟院風滿碧梧林瀟爽塵如洗清  
冷火乍沉

包侍御集卷之三